

共同經課 - 1

撒母耳記下十一章二十六節~十二章十三節 a

26 烏利亞 ê bó 聽見丈夫烏利亞已經死，就為伊 ê 丈夫啼哭。27 Teng-iu 已經明白，大衛差人 choā 伊到宮內；伊就做伊 ê bó，kā 伊生一個 kiáⁿ。總是大衛所行 ê 事，耶和華真無歡喜。12:1 耶和華差 Ná-tan 去見大衛；伊到伊 hia，kā 伊講，Tī 一個城有兩人，一個好額，一個 sòng-hiong。2 好額 ê 有牛羊真 choē；3 sòng-hiong 人無甚麼，只有一隻羊種 á，就是伊所買來飼 ê，伊 kap 伊 tī-hia，kap 伊 ê kiáⁿ 相 kap 長大，食伊所食 ê，lim 伊 ê 杯，睷 tī 伊 ê 胸前，看伊親像家己 ê cha-bó-kiáⁿ。4 有一個出外人到好額人 hia，好額人 m̄甘對伊 ê 羊群牛群取來備辦 hō 人客食；反 tng 取 sòng-hiong 人 ê 羊 á，備辦來 hō 人客食。5 大衛大受氣 hit 人，kā Ná-tan 講，我 kī 永活 ê 耶和華來 chiū-choā，行 chit-ê tǎi-chi ê 人 tiòh 死；6 tiòh 賠伊 ê 羊 á 四倍；因為伊行 chit-ê 事，也因為伊無憐憫 ê 心。7 Ná-tan kā 大衛講，你就是 hit 人。耶和華以色列 ê 上帝 án-ni 講，我用油抹你做以色列 ê 王，救你脫離掃羅 ê 手。8 我 koh 用你 ê 主 ê 厝宅 hō 你，用你 ê 主 hiah-ê bó 交 tī 你 ê 胸前；koh 用以色列 kap 猶大家 hō 你；chiah-ê 若 iáu 掠做小 khoá，我會加添 chit 號 hit 號 hō 你。9 你啥事看輕耶和華 ê 命令，行伊所看做 pháiⁿ ê 事？你用刀 thài 死 Hek 人烏利亞，就是借 A-bùn 人 ê 刀 thài 死伊，koh 娶伊 ê bó 做你 ê bó。10 Taⁿ 刀劍 beh 永遠無離開你 ê 家，因為你看輕我，chhoā Hek 人烏利亞 ê bó 做你 ê bó。11 耶和華 koh án-ni 講，看 ah，我 beh 對你 ê 家興起災厄攻擊你；我 beh tī 你 ê 目矚前，用你 hiah-ê bó hō 你 ê 厝邊，伊 beh tī 青天白日 kap 你 hiah-ê bó 同房。12 因為你 tī 暗中行伊，總是我 beh tī 青天白日，tī 以色列眾人 ê 面前，行 chit-ê 事。13 大衛 kā Ná-tan 講，我有得罪耶和華。

共同經課 - 2

詩篇五十一篇一節~十二節

1 大衛 kap Poát-sī-pa 同房以後，先知 Ná-tan 來見伊，伊做 chit-ê 詩；交 hō 樂官。1) 上帝 ah，照你 ê 慈愛憐憫我；照你豐盛 ê 慈悲擦消我 ê 過失；2 將我 ê 罪惡一盡洗除，亦洗清我，到無罪。3 因為我家已知我 ê 過失；我 ê 罪常常 tī 我 ê 面前。4 我所犯 tiòh-ê，就是得罪你 nā-tiāⁿ，Tī 你 ê 目矚前行 chit 號 pháiⁿ；致到你講話 ê 時，顯明做義；判斷 ê 時，顯明公道。5 我是 tī 罪惡中生 ê，Tī 罪 ê 中間，我 ê 老母懷孕我。6 你所 ài-ê 是心內誠實；Tī 我 ê 腹內，你 beh hō 我得 tiòh 智慧。7 求你用牛漆草洗我，我就清氣；求你洗我，我就比雪 khah 白。8 求你 hō 我得 tiòh 聽見歡喜快樂 ê 聲；Hō 你所 at 折 ê 骨 thang 歡喜。9 求你掩你 ê 面，無看我 ê 罪，擦消我一切 ê 罪惡。10 上帝 ah，求你 kā 我創造清氣 ê 心，Hō 我 ê 內面有換新正直 ê 神。11 M-thang 趕我，hō 我離開你 ê 面；M-thang tùi 我收回你聖 ê 神。12 求你 hō 我猶原得 tiòh 你救恩 ê 快樂；賞賜我有自由 ê 神，來扶持我。

共同經課 - 3

以弗所書四章一節~十六節

1 所以我 tiàm-tī 主做囚犯 ê，勸 lín 行 tǎi-chi tiòh 合 tī 所受 ê 召，2 凡事謙遜、溫柔，用吞忍，tī 仁愛相寬容；3 用和平相結聯，致意守聖神所賞賜 ê 合一。4 因為體一個，神一個，親像 lín 受召 ê ng 望也是一個，5 主一個，信一個，洗禮一個，6 上帝一個，做眾人 ê 父，tī 萬有 ê 頂面，貫串 tī 萬有，tiàm-tī 萬有 ê。7 總是用恩典 hō 咱 tàk 人，是照基督恩賜 ê 份量。8 所以講，伊升高 ê 時就掠 hiah-ê 受掠 ê，也將 chiah-ê 恩賜分 hō 人，9 (Taⁿ 既然講，伊升高，kiám m̄ 是伊 bat 降落 tī 地下 mah？10 hit-ê 降落 ê 就是 hit-ê 升高 tī chiah-ê 天 ê 頂面 ê，beh 充滿萬物。)11 伊所賞賜 ê，有使徒；有先知，有傳福音 ê，有牧師 kap 先生，12 為 tiòh beh hō 聖徒齊備，來做差用 ê 工，起造基督 ê 身體；13 直到咱眾人 tī 信，以及 bat 上帝 ê Kiáⁿ，來合一，到成一個完全 ê 人，到得 tiòh 基督 ê 充滿來長成 hit 般；14 beh hō 咱無 koh 做 gín-ná，hō tàk 樣教示 ê 風搖 choah 漂流，中 tiòh 人 ê 詭計，kap 瞞騙，致到 hō 人差謬 ê 法術；15 是 tiàm-tī 仁愛講話真實，hō 咱 tī 萬項漸漸大，到 tī hit-ê 做頭 ê，就是基督；16 tùi tī 伊，全新結合連絡，就是 tùi 百節 ê 相接應，照 tàk 體該然 ê 運動，致到身軀 ná 長大，tī 仁愛家己起造。

共同經課 - 4

約翰福音六章二十四節~三十五節

24 眾人看見耶穌 kap 伊 ê 學生 lóng 無 tī hia，就搭 hit 幾隻船 á，到迦百農 chhē 耶穌。25 已經 tú-tiòh 伊 tī 海 ê hit-pêng 岸，就 kā 伊講，拉比，你甚麼時到 chia？26 耶穌應講，我實實 kā lín 講，Lín chiah-ê chhē 我，m̄ 是因為看見神蹟，是因為食餅到飽 nā-tiāⁿ。27 莫得為 tiòh 會敗壞 ê 米糧來 tiòh 磨，tiòh 為 tiòh 長長 tī-teh 永活 ê 米糧來 tiòh 磨，就是人子所 beh hō lín ê；因為伊是父上帝所蓋印 ê。28 In 就對伊講，阮 tiòh 怎樣行，來做上帝 ê 工？29 耶穌應講，信伊所差 ê，chit-ê 就是上帝 ê 工。30 In kā 伊講，你行甚麼神蹟，hō 阮看，來信你 ah？你行甚麼 ah？31 阮 ê 祖 tī 曠野食 má-ná；照所記載講，用 tùi 天來 ê 餅 hō in 食。32 耶穌 kā in 講，我實實 kā lín 講，m̄ 是摩西用 tùi 天來 ê 餅 hō lín，就是我 ê 父用 tùi 天來 ê 真餅 hō lín。33 因為上帝 ê 餅，就是 hit-ê tùi 天落來，也用活命賞賜世間 ê。34 In 就對伊講，主 ah，常常用 chit 號餅 hō 阮。35 耶穌 kā in 講，我就是活命 ê 餅；就近我 ê 人決斷 boē iau，信我 ê 人永永 boē 嘴乾。